

## YITAKARI ISANKINARI JUAN

*Ñaantsi okanta-kota Añaantarintsi*

<sup>1</sup> Yoka kanta-kota-chari aka nosankinatzimiri: Iriira ipaitai-tziri “Ñaantsi Añaakaan-taniri.” Itzimitaika pairani owakira itantana-karori iwitsikan-taitzi. Naaka kimataikiri, naaka ñaataikiri, nantantaari nako. <sup>2</sup> Iñaakantaka irirori, inampita-paintaro kipatsiki, naakayitaki ñaakiri. Irootaki nokinkithata-kotan-takamiriri asi owaironi añaantarintsi, tima yañaitzitataaika pairani irirori itsipatakari Asitariri, Iriitaki ñaakaanari naakaiti. <sup>3</sup> Irootaki nokinkithata-kotan-tamiriri nokitakari, nokimakiri aajatzi, thami aapatyaa-wakai-yitajyaa arokaiti. Iriita-jaantakira Asitairi aapatyaaari, ari ankanta-najiriri aajatzi Itomi. <sup>4</sup> Iro opoñaantari nosankinatzimiro awirokaiti, ari onkantyaa panintaa-piroiwaitan-tyaari.

*Ipaitai-tziri Pawa Kitainkari*

<sup>5</sup> Iroka ñaantsi iyota-kayinari, irootaki nowawisayimiri awirokaiti: Ipaitai-tziri Pawa “Kitainkari.” ¡Tikachaa-jaini inkimitzi-motyaari tsitinikiri! <sup>6</sup> Aririka ankanti “Naapatyaaari Pawa,” aikiro-rika antapiinta-tyiilo kaari-pirori, athaiyaka. Okimiwaitakaro aniiatyiimi otsitini-kitzi, apiyathatakaro iroopirori. <sup>7</sup> Irooma aririka aniti okitainkatzi, akimita-kotaari Pawa isaiki irirori okitainkatzi, aritaki amatakiro aapatyaa-wakaa-najyaa. Ari onkantyaa impyaakotan-tairori antawitakaro kaari-pirori, irootaki

ikapathai-nkatan-takari pairani Jesús Saipatzii-totaari, Itomi, ikamawinta-kaira. <sup>8</sup> Aririka ankanti “Ti nanta-nitiro kaari-pirori,” apaniro amatawi-waitaka, ti ayota-kotiro iroopirori. <sup>9</sup> Irooma aririka ankaman-tajiri Pawa antakiro kaari-pirori, aritaki imatakiro impyaakotairo. Tima iriapiro-winta-yitaji irirori, tampatzikasiriri inatzii, iriitaki kitisiri-pirota-kairi. <sup>10</sup> Aririka ankanta-waiti “Ti nonkaaripiroti,” okimiwaitakaro ankanta-tyiimi “Thayinkari inatzi Pawa.” Tira ayota-kotajiro iñaani.

## 2

### *Iri Saipatzii-totaari ookakaa-winta-yitairi*

<sup>1</sup> Notomiiti, opoñaantari nosankinatzimiro iroka ari onkantyaa airo pantantaro kaari-pirori. Irooma aririka antakiro kaari-pirori, tzimatsira ookaako-wintaini Asitairiki. Iriitaki Jesús Saipatzii-totaari, kamiithasiriri. <sup>2</sup> Iriitaki atsimiwinta-kairi akaaripiro-witaka. Ti apatziro yatsipi-winta-kai arokaiti, maaroni atziri ikaratzi nampitarori kipatsiki. <sup>3</sup> Iroka ayotantyaari iriapiro-rika ayotajiri Saipatzii-totaari: Aririka amonkarata-piinta-najiro ikantakaantairi. <sup>4</sup> Tzimatsi-rika kantawita-chani, “Noyotziri naaka,” iro kantacha ainiro ipiyathataro ikantakaantani, ithaiyakara yoka. Ti iyotakotiri iriapiro. <sup>5</sup> Tzimatsi-rika monkarata-najirori ikantakaantani, iriitakira ninta-pirotnajiriri Pawa. Irootaki iyotantyaari iroopirora yaapatyaa-naari. <sup>6</sup> Tzimatsi-rika kantatsini,

“Naapatyii-yaari naaka,” ontzima-tyiira isiyakota-jyaari tsika ikanta-painta irirori Saipatzii-totaari.

*Owakirari ikantakaan-taitziri*

<sup>7</sup> Iyikiiti, tira nomapokimi nokaman-tzimiro iroka nosankinata-kimirri. Iro piyotzi-taikari pairani. Irootaki ñaantsi pikimayitakiri pairani awirokaiti. <sup>8</sup> Irootaki kimitakarori owakirari ikantakaan-taitani, okantakaaro yanta-paintziri Saipatzii-totaari. Okantakaaro pantayita-najiri awirokaiti. Kimiwaitaka awisai-nkatanaki tsitiniinkari, kitainkata-paaki iriipirori kitainkari. <sup>9</sup> Tzimatsi-rika kantatsini, “Yasitaana kitainkari,” titzimaита iwashaantiro ikisaniinta-wakaa ikaratzi ikimisantz-in-karitzi, tikiraata imatiro, okimiwaitakaro irojatzi isailkakimi otsitini-kitzi. <sup>10</sup> Iriima ikaratzi itakota-naariri kimisantz-in-kariiti, iriitakira kimitanaariri aniitanaa-tsiri okitainkatzi, ti intzipinatyaa. \* <sup>11</sup> Ikaratzi kisaniiinta-wakaa-chari ikimisantz-in-karitzi, ikimitakari aniitarori tsitinikiri. Ti iyoti tsika ikini, ti yokichaati otsitini-kitakira.

<sup>12</sup> Notomiiti, awiroka nosankinatzini iroka pawintaarira Saipatzii-totaari,  
Irootaki ipyaakotan-taamirori piyaari-pirosirinka. †

<sup>13</sup> Asitaaniri, awiroka nosankinatzimi, tima piyotajiri Saipatzii-totaari itakarori yañaaki pairani itantana-karori iwitsikan-taitzi.  
Mainariiti, awiroka nosankinatzini, tima piitsinampaajiri Kamaari.

---

\* **2:10** tzipina = antziwa   † **2:12** pawintaari = wairontsi

Notomiiti, awiroka nosankinatzini  
tima piyotajiri Asitaamiri.

<sup>14</sup> Asitaaniri, awirokaiti nosankinatzimi  
tima piyotajiri itakarori yañaaki pairani  
itantana-karori iwitsikan-taitzi.  
Mainariiti, awiroka nosankinatzimi  
tima aawyaasiri pikanta-yitaja, piyotajiro iñaani  
Pawa,  
piitsinampaajiri Kamaari.

<sup>15</sup> Airo pitakosiwitaro osaawi-sato. Tzimatsi-  
rika itasiwaita-kyaaroni osaawi-sato, tira ininta-  
pirotajiri Asitairi Pawa. <sup>16</sup> Tima maaroni  
osaawi-sato tira iri Pawa poñaakaan-tyaaroni,  
osaawi-sato onatzi. Iroka okanta osaawi-  
sato, aniwita-siwaitaro karipirota-tsiri, ayimatai  
otzimi-motajai awaararo, anintawaiti ashami-  
winta-waityaa. <sup>17</sup> Maaroni osaawi-sato iniwiy-  
itari atziri-payi, ari apirotajyaa. Iriima an-  
tanajironi inintziri Pawa, iriitaki asi owaironi  
yañaaji.

### *Kisaniintziriri Saipatzii-totaari*

<sup>18</sup> Notomiiti, irootaintsi onthonki-matajyaa  
kipatsi. Pikimayitaki awiroka ari inkoñaataki  
kisaniintirini Saipatzii-totaari aririka  
onthonki-matajyaa. Tzimataiki iroñaaka  
aka kisaniinta-yitakiriri Saipatzii-totaari.  
Irootaki ayotantari irootzi-mataki onthonki-  
matajyaa kipatsi. <sup>19</sup> Yokaiti kisaniinta-kiriri  
Saipatzii-totaari, iriiyatki akarawita-piintakari  
akimisantzi, yookawaitanakai. Omapirotyaami  
intsipatajaimi, airo yookaa-winta-yitaimi. Ari  
ayoyitzi tira omapirota-jaantyaa inkara-siri-  
yitaji arokaiti. <sup>20</sup> Iro kantacha awirokaiti

ityaankai-takiri Tasorinkantsi inampi-siritan-tyaamiri, kimiwaitaka isaipatzii-toitan-takamiri. Tima piyoyitajiro awirokaiti iroka. <sup>21</sup> Irootaki nosankinatan-tamirori, tima piyotajiro awiroka iroopirori. Piyoyitajiro pinasitaaro iroorika thaiyaantsi. <sup>22</sup> ¿Tzimatsima thaiyachari? Tima tzimatsira, iriitakira kantatsiri “Yoka Jesúس kaari Saipatzii-totaari.” Iriitaki apaitziri “Ikisaniintani Saipatzii-totaari.” Irijatzi maninta-kiriri Pawa aajatzi Itomi. <sup>23</sup> Itzimi-rika maninta-waitakirini Itomi Pawa, iriitaki imaninta-jaantaki Pawa. Iriima kantanaa-tsiri: “Nawintaajari naaka Itomi Pawa,” omapiro yasitaari Asitariri. <sup>24</sup> Irooma awirokaiti, oisokiro pinkantanakiro pitakari pikimakiro pairani. Iroorika pimatanakiri, ari poisokirota-kyaa Itomi, ari pinkimitaa-nakiriri aajatzi Asitariri. <sup>25</sup> Iroka ikasiya-kaakairi irirori: Asi owairo añaasiriyitai.

<sup>26</sup> Irootaki nosankinatzimiri tsika ikanta-kota nintayita-tsiri yamatawi-yitimi. <sup>27</sup> Iro kantacha oisokiro pikanta-wintakaro awirokaiti isaipatzii-toitakimi. Irootaki airo okowityaanta pasini yomitaa-jimini. Yoka Tasorinkantsi ikimitakaantai-takari isaipatzii-toitan-takyaarimi, iriitaki oyomitaa-jimiri kamiitha. Iyomitaimiro iroopirori, kaari thaiyaantsi iyomitaimiri. Ontzimatyii pantayitajiro tsika okanta iyomitaimi irirori, paapatyii-yaari.

<sup>28</sup> Ari okanta notomiiti, ontzimatyii aapatyii-yaari Saipatzii-totaari, ari onkantyaa airo apasiki-winta-waitanta aririka impiyaki, awintaa-siri akantyaa amonthaa-wajyaari.

<sup>29</sup> Tima piyoyitajiri kamiithasiriri inatzi Saipatzii-totaari, piyotajiri aajatzi ikaratzi asiminthata-naarori yantanajiro kamiithari itominta-naarira Pawa.

## 3

### *Itomiiti Pawa*

<sup>1</sup> Pinkinkithasiritiro iroka: Antaro itakotai Pawa, itomiyitai. Omapiro. Tira ikimathatiro osaawi-satzi tsika ipaita Saipatzii-totaa-rita-tsiri, ari ikimiyitairi aajatzi arokaiti ti ikimatha-yitai.

<sup>2</sup> Ari okanta notakoyitanii. Itomi Pawa anayitaji. Tikira ayota-jaantiro tsika ankanta-yitajyaa apaata. Apatziro ayotzi ari ankimita-jyaari ikantara Saipatzii-totaari aririka impiyapaaki, tima ari onkantaki añairi tsika ikantara irirori.  
<sup>3</sup> Maaroni atziri oyaakoniintariri, yanta-piintairo onkarati kitisirita-kairini. Tima Saipatzii-totaari kitisiri ikanta irirori.

<sup>4</sup> Iriima kaari washaantironi yantayitziro kaari-pirori, ipiyathata-tyaaro ikantakaan-tziri Pawa. Tima piyathataantsi onatzii kaari-pirori. <sup>5</sup> Piyojiitzi awiroka opaita ipokantakari Saipatzii-totaari kipatsiki, tima iro ipokantakari yapirotajiro kaari-pirori. Tira yanta-paintiro irirori kaari-pirori. <sup>6</sup> Ikaratzi oisokirota-naariri Saipatzii-totaari, ti onkamiithati yantanajiro kaari-pirori. Tima inkarati oisokirotarori kaari-pirori, tira iyotajiri Saipatzii-totaari. <sup>7</sup> Notomiiti, airo pamatawitaa-ritzi. Inkarati antapiinta-najironi kamiithari, iriitakira kamiithasiriri,

ikimita-kota-naari Saipatzii-totaari ikamiithasiritzi Irirori. <sup>8</sup> Iro kantacha itzimi-rika antapiinta-kirori kaari-pirori, irasi Kamaari yoka. Tima iri Kamaari itakaan-takarori yantakiro kaari-pirori. Irootaki ipokantakari Itomi Pawa kipatsiki, yapirotajiro kaari-pirori yanta-piintziri Kamaari. <sup>9</sup> Iriima ikaratzi iwamiitha-siritairi Pawa kimitanaa-chari owakirami intzima-yitaimi, tira yanta-piinta-najiro kaari-pirori. Tima Pawa tominta-naari. <sup>10</sup> Irootaki kaari okompitanta ayotiri itzimi yasiyitari Pawa, itzimi yasiyitari Kamaari. Maaroni kaari antapiintaironi kamilithari, tira intsipatyaari Pawa. Ari ikimitari aajatzi kaari itakota-wakaa-chani ikimisantzinkaritzi, ti intzipatayjari Pawa.

<sup>11</sup> Iroka ñaantsi pikimayita-wakiri pairani owakira pikimisantan-tanakari, ikantaitzi: Ontzimatyii antakota-wakai-yitajyaa. <sup>12</sup> Airo asia-kotari ikanta Caín, yasitari Kaari-pirosiriri, iwakiri iririntzi. ¿Paitama iwan-takariri? Iro iwan-takariri okantakaari ikaaripiro-siritzi Caín, iriima iririntzi kamilithasiri inatzii irirori. <sup>13</sup> Iyikiiti, airo okompitzi-motami ikisa-niinta-waitzimi osaawi-satzi. <sup>14</sup> Ayojiitzi aroka, kimiwaitaka kamasiri akantayi-witaka pairani. Iro kantacha iroñaaka, kimiwaitaka añaasiri-yitai. Iro ayotantari, tima antakoyita-wakaa-piintyaa akimisanta-yitajira. Itzimi kaari itakotan-tachani, ikimitakari kamasiriri. <sup>15</sup> Itzimi-rika kisanaintan-tatsiri, ikimitakari owan-tsinkari. Ayotako-jiitziri aparoni owan-tsinkari airo iñaajiro yañaa-siri-yitai. <sup>16</sup> Yoka oñaakanta-pirotzirori tsika ikantaita

itakotan-taita: Ikamawintakai Saipatzii-totaari arokaiti. Iro amatanajiri arokaiti, wintha ankantyaa ankamawintan-tayiti.

<sup>17</sup> Tzimatsi-rika otzimi-motziri owaararontsi, impoña iñaaaji aparoni iyiki kowityaa-waitatsiri, iriitaki imasitha-waitaki yoka iyiki, tikira imapirotziro intakota-jyaari Pawa.

<sup>18</sup> Notomiiti, ti onkamiithati ankanta-sitaipiintyaa, “Notakotanta.” Ontzimatyii amatairo oiñaarontzirori itakotanta.

<sup>19</sup> Irootaki ayotantari omapiro yasiyitai Iriipirori Pawa. Tima ayotaji yasiyitai Pawa, irootaki awintaa-siritan-tariri amana-mantaari, <sup>20</sup> onkanta-witakyaa ontzima-yitimi ompaityaa katsitzimo-siritaini. Tima Pawa iyotziro maaroni, iyotzitaro akinkitha-siritan okaratzi katsitzimo-sirita-kairi akaaripirotaki.

<sup>21</sup> Notakotaní, aririka awashaanta-najiro ayaaripironka okaratzi owari-siryaa-yitairi, airora atharowan-tanaari Pawa amana-manatairi. <sup>22</sup> Iro ayotantyaarori aritaki imatakairo onkarati ankowako-yitiriri. Tima amonkara-yitajiro ikantakaantsiri, antapiintainiri inintziri irirori. <sup>23</sup> Iroka ikantakaantatsiri: Ontzimatyii awintyaari Jesús Saipatzii-totaari, Itomi Pawa. Ontzimatyii antakota-wakai-yitajyaa aajatzi. Irootaki ikantakaantatsiri amatairi. <sup>24</sup> Inkarati monkarataironi ikantakaantatsiri, iriitakira oisokirotaariri Pawa. Irijatzi Saipatzii-totaari yoisokirotzitari irirori. Iriitaki Tasorinkantsi ityaanka-kairi oyotakaa-yitajiri omapiro yoisokirotari.

## 4

*Itasorinka Pawa ipoñaa iisaniinta-siritani  
Saipatzii-totaari*

<sup>1</sup> Notakoyitaní, tzimatsira oshiki kantawita-chari: “Naaka Kamantan-tzinkari.” Iro kantacha kamaari ñaawaita-kairiri. Irootaki airo pikimisantantari okaratzi inkanta-yitiri, ontzimatyii piñaantyaari iriita-jaantaki-rika Pawa ñaawaita-kairiri yoka Kamantan-tzinkari.

<sup>2</sup> Iroka ayotantyaari iriirika Itasorinka Pawa ñaawaita-kairiri, aririka inkanti: “Yatziritzimotajai Jesús Saipatzii-totaari.” <sup>3</sup> Iriima thainka-ñaanitzirori ikantai-takiri, kaarira yasitari Pawa, iriira iñaawaita-kairi Iisaniintani Saipatzii-totaari. Pikimako-jiitakiri awirokaiti, ari intzimaki aka kipatsiki ñaawaitironi iroka. Aritakira tzimaki. <sup>4</sup> Iro kantacha awirokaiti, notomiiti, yasitami Pawa, awiroka anaakoyitairiri. Tima antaroiti isintsinka Saipatzii-totaari, itzimi aapatyaamiri awirokaiti. Yanaa-kotajiri aapatyaa-yitariri osaawi-satzi.

<sup>5</sup> Yokaiti kamantanta-nirori osaawi-satzi inatzi. Irootaki ikimisanta-wakaantari ikaratzi isaawi-satzitayini. <sup>6</sup> Irooma arokaiti yasiyitai Pawa. Irootaki pikimisantan-tanari pikaratzi yasipirotaami Pawa. Titzimaita inkimisanta-yitina kaari yotajirini Pawa. Ari okanta, ti onkompitaa ayoyitajiri iñaawaita-kaayitairi Tasorinkantsi, ari okanta imatantaarori iyomitaan-tairo iroopirori. Ari ayotziriri yasitari Kamaari itzimi oyomitaan-tzirori kinasiwaitaantsi.

*Pawa iriitaki ipaitaitziri “Itakotantsi”*

<sup>7</sup> Notakoyitaní, ontzimatyii pintakota-wakai-yitajyaa. Tima iriitaki Pawa kantakaaro opoñaantari itakotantsi. Itzimi-rika matanajirori iroka, itominta-naatyaari Pawa. Iriiyitaki oyoyitairiri. <sup>8</sup> Itzimi-rika kaari itakotantachani, ti iyotajiri Pawa. Tima iriitaki Pawa ipaitaitzi “Itakotantsi.” <sup>9</sup> Iroka ikanta Pawa iñaakajairo omapiro itakotai: Ityaanta-kairi yapintziti Itomi aka kipatsiki, ari okanta yañaa-sirita-kaantairi arokaiti. <sup>10</sup> Iroka okantakota iroopirori itakonkantsi: Tira arokaiti poñaakaan-tyaaroni anintajiri Pawa, iriitaki Pawa poñaakaan-taarori itakoyitai. Tima antarоiti itakoyitai, ityaanta-kairi Itomi. Iriitakira yatsipita-kaitari ari okanta yaripirotan-taitairi akaaripiro-wijiitaka arokaiti. <sup>11</sup> Notakoyitaní, oshiki itakotaira Pawa, ari ankimiyyita-yaari arokaiti antakota-wakai-yitajyaa. <sup>12</sup> Tikatsira aparoni atziri matironi iñiiri Pawa. Iro kantacha arokaiti kantatsi aapatyii-yaari aririka antakota-wakai-yitajyaa. Iriitakira Pawa matakaironi ajatakaan-tyaarori antakotanta-piintajyaa.

<sup>13</sup> Tima Pawa ityaanka-kairi Tasorinkantsi inampi-siritantai, irootaki ayotantaari omapiro aapatyaaari. <sup>14</sup> Tima naakayita-jaantaki ñaakiriri Itomi Pawa, itzimi ityaankakiri iwawisaa-kotairi osaawi-satziiti. Iriitakira nokinkithata-koyitajiri. <sup>15</sup> Itzimi-rika kantatsiri, “Jesús Itomi inatzi Pawa,” iriitakira mapirotzirori yaapatyaaari Pawa. <sup>16</sup> Ayotajira arokaiti tsika ikanta itakoyitakai Pawa, akimisanta-yitajiri. Tima iriitaki Pawa ipaitaitzi “Itakonkantsi.” Inkarati itakotanta-piintaa-chani, yaapatyaa-piintaari

Pawa. <sup>17</sup> Tima iroopiro-rika antakota-wakaiyaa, akimita-kota-naari tsika ikanta-painta isaika-paintzi aka kipatsiki yoka Saipatzii-totaari, tikatsi ompaityaa antharowan-tantyaariri aririka impiyaki yaminako-yitairi ikaratzi nampitarori aka kipatsiki. \* <sup>18</sup> Aririka antakotantyaa tikatsi antharowantyaa. Tima iroka itakonkantsi okimitari owayiri imisitowiri iisanintani iroka tharowan-kantsi. Aririka antharowan-tyaari Pawa iwasankitaaji, tikiraatara ayotiro antakotantyaa. <sup>19</sup> Irootaki anintan-taariri arokaiti Pawa, apiyata-tyaari yitakarora itakoyitakai arokaiti. <sup>20</sup> Intzimiri-rika kantatsini, “Nonintani inatzii Pawa,” iro kantacha ikisasiritziri iyiki, ithaiyaka yoka. Tima kaari itakotyaarini ishininka, yokitari irorori, ¿Tsikama inkini inintiri Pawa, kaari koñaanita-tsini? <sup>21</sup> Iroka ikantan-taitari pairani: Ikaratzi nintairiri Pawa, ontzimatyii intakota-wakai-yitajyaa.

## 5

*Awintaa-sirinka aiitsinampaan-tyaari osaawi-sato*

<sup>1</sup> Maaroni awintaa-siritaniri kantatsiri, “Yoka Jesúś, Saipatzii-totaari inatzii,” Pawa tominta-naari. Ikaratzi itakotaariri Asitairi, itakotaarira aajatzi ikaratzi itomitaari irorori. <sup>2</sup> Aririka

---

\* <sup>4:17</sup> aririka impiyaki: ltitiriti Pinkathari

anintajiri Pawa, aririka amonkarata-jiniri ikan-takaantani, irootaki ayotantaari omapiro itakoy-itari ikaratzsi itomitaari irirori.<sup>3</sup> Aririka anintapirota-najiri Pawa, osiyawaitakaro amonkarata-jinirim ikan-takaantani. Airo opomirintsita amonkara-yitajiro ikantakaantsiri.<sup>4</sup> Ikaratzsi ito-mintaari Pawa, ari yiitsinampa-a-yitairo osaawi-sato. Tima awintaa-sirinka iiitsinampaan-tayityaa.<sup>5</sup> ¿Tzimatsima matironi yiitsinampa-pairo osaawi-sato? Iriitaki mataironi awintaa-siritaniri, kantatsiri: “Itomira Pawa inatzii yoka Jesús.”

### *Ikinkithata-kaantziri Tasorinkantsi*

<sup>6</sup> Tima ipokaki Saipatzii-totaari aka kipatsiki. Iro kantacha, tira apatziro ipokaki inkiwaantan-tyaaro nijaa, ontzimatyii onkapathai-nkati aajatzi iriraani, iwamaitiri. Iriitaki Tasorinkantsi kinkithata-kaanta-kirori tsika okanta-kota iroka. Okaratzsi ikinkithata-kaantziri irirori, iroopirori onatzi.<sup>7</sup> Tima mawa yapiitai-takiro ikantaitzi Itomi Pawa inatzii. \*<sup>8</sup> Itanakarori iriitaki Tasorinkantsi kinkithata-kaanta-tsiri. Apitita-tsiri, iriitaki Pawa ñaawaitaintsi ikiwaa-paitita-karanki Jesús. Mawatatsiri, iriitaki Pawa ñaawaitaintsi ikinkithata-kotzi-roranki Jesús tsika inkantyaa iwamaitiri. Ti ompasiniti

---

\* **5:7** Tzimatsi sankinarintsi ikantaitzi: Mawa ikaratzsi ñaawaita-tsiri inkitiki: Asitairi, Ñaantsi, Tasorinkantsi. Yoka karatatsiri mawa, aparonira ikanta. Paminiro: onasiyita ñaantsi-payi

ikantai-tziri, siyakaa-wintantsi onatzii. †

**9** Tima ankimisantiri atziri-payi okaratzi ikantayitziri, iri oowatsipiro ankimisantajiri ikantairi Pawa. Iroka ikantaki ikinkithata-kotziri Jesús Saipatzii-totaari, ikantzi: “Iriitaki Notomi yoka.” **10** Itzimi-rika kimisantairiri Itomi Pawa, iriitaki kimathatairori omapiro okaratzi ikantakiri Pawa. Iriima kaari kimisanta-tsini ipaitakiri taiyawari Pawa, tima ithainka-ñaanitakiri ikantaki “Notomi inatzii Jesús.” **11** Iroka ikantai-takiri: Iriitaki Pawa kantakai-yaaroni añaasiritan-tajyaari, tima awintaari Itomi. **12** Ikaratzi aapatyiyaarini Itomi aritaki yañaa-siritai. Iriima kaari aapatyiyaarini Itomi Pawa, airo yañaa-siritai.

### *Ayoyitaji asi owairo añaasiri-yitai*

**13** Tima pawintaari awirokaiti Itomi Pawa, pilkimisantairi. Irootaki nosankinatan-tamirori iroka ari onkantyaa piyopirotan-tyaari pasi

---

† **5:8** Okaratzi kanta-kota-chari aka, iriira ikinkithata-koitzi: “Tasorinkantsi, Nijaa, Iraantsi. Ikaratakira mawa, ti ompasininiti siyakaa-winta-chari.” Inintatzii aka Juan, iyotako-piroitiri Jesús omapiro Itomitari Pawa. Tima mawa okaratzi yapiitai-takiro ikinkithata-koitziri, ikantaitaki: “Itomi Pawa inatzii yoka Jesús.” Itanakarori, iriita-jaantaki Tasorinkantsi oyotakaa-yitairiri Intyaantaa-riti Saipatzii-totaari iyomitaan-tayiti. Apitta-tsiri, irootakira “Nijaa” siyakaa-winta-chari ikiwaata-karanki Jesús. Irootaki ikinkithata-jaantakiri Pawa, sankinatain-chari Mt. 3.16-17. Mawatatsiri, irootaki “Iraantsi” siyakaa-wintacha ikapathai-nkatakaitakirira Jesús iwamaitan-takariri. Irootaki ikinkithata-jaantakiri Pawa isaikan-takari-ranki Jesús otzisiki ikinkitha-waita-kairi Moisés aajatzi Elías tsika onkantyaa iwamaitiri. Iro sankinatain-chari Lc. 9.31-35; Jn. 12.27-33.

piwairo pañaayitaji apaata. ‡ 14 Awintaa-sirira ankantajiri Pawa, tima ayoyitzi ikimayitai aririka amana-manata-kotairo tsika okanta inintakaajairi irirori. 15 Ayoyitajira ikimai Pawa aririka amaniri, ayotzita aajatzi ari imatakairo okaratzi akowa-kota-kiriri. 16 Aririka piñiri awiroka aparoni iyiki tzimatsiri ikinakaa-sitani, pamana-kotairi, aritaki yañaa-sirita-kaajiri Pawa. Iriitaki nokanta-kotzi aka tzimatsiri ikinakaa-sitani kaari mapirotachani onkaaripiroti. Tima tzimatsi kaari-pirori kowiinkata-tsiri. Tira iro noñaawinti. Timu ti onkamiihati amana-kotairi antakirori mapirotzirori okaaripirotzi. 17 Noñaawintakiro “kaari-pirori kaari mapirotachani,” tira nonkantatyii kamiithatatsi iroka. Maaroni kaari kamiithatatsi, ti onkamiihati antayitiro. Iro kantacha tzimatsi kaari-pirori kaari kowiinkatasiri.

18 Ayojiitzi ti yanta-piintajiro kaari-pirori ikaratzi itomintaari Pawa. Iriitaki Saipatzii-totaari aamaako-wintaari, airo ikimaatsita-kaantaari Kamaari.

19 Timu ayoyitaji aroka yasiyitai Pawa. Iriima osaawi-satzi, iriira asitaari Kamaari, ipinkathari-wintziri maaroni.

20 Timu ayoyitaji ipokaki Itomi Pawa, iritaki kimathata-kaayitairori iroopirori. Irootaki amatantaarori ayotajiri ipaitai-tziri “Iriipirori.” Aapatyii-yaari Iriipirori, timu aapatyaakari Itomi, iriitaki Jesús Saipatzii-totaari. Iriitaki

---

‡ 5:13 pawintaari: wairontsi

Pawa ipaitaitzi “Iriipirori,” ipaitai-tziri aa-jatzi “Añaanita-tsiri.”<sup>21</sup> Notomiiti, paa-maiyaari pipinkathatziri = kari pawaniro-payi. Omapirowí.

**Ashéninka Perené  
Ashéninka Perené: Ashéninka Perené (New  
Testament+)**

copyright © 2004 Wycliffe Bible Translators, Inc.

Language: (Ashéninka Perené)

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 22 Feb 2024 from source  
files dated 29 Jan 2022

4937822c-7fbb-5a7c-989d-ccf71fe482a2